

DECLARACIÓN INSTITUCIONAL POR UN PASO SEGURO DAS PERSOAS REFUXIADAS

Máis de 80 000 persoas chegaron a Europa por vía marítima durante as primeiras seis semanas de 2016 e máis de 400 morreron afogadas tratando de atravesar o Mediterráneo. Malia as pésimas condicións marítimas, as inclemencias do inverno e as numerosas dificultades que padecen tras a súa chegada, unha media diaria de máis de 2000 persoas continúan arriscando as súas vidas e as dos seus fillos/as tentando chegar a Europa. Máis do 91 % das persoas chegadas a Grecia proveñen dos dez principais países de orixe de persoas refuxiadas, nomeadamente de Siria, e tamén Afganistán e Iraq. Ao seren entrevistadas á súa chegada, a maioría declara que deixaron os seus países debido aos conflitos que alí están a ter lugar.

Moitas destas persoas foxen da guerra, da opresión e da tortura; outras da pobreza, da persecución e as violacións dos dereitos humanos. Todas elas queren unha vida mellor e máis segura. Pero as súas rutas de saída cada vez son máis escasas, xa que os países que acollen persoas refuxiadas -como o Líbano, Turquía ou Xordania- están desbordados.

O mundo enfróntase á peor crise de persoas desprazadas desde a Segunda Guerra Mundial. Porén, Europa está pechando as súas fronteiras. Os gobernos europeos veñen destinando fondos de asilo e migración á blindaxe das nosas fronteiras, a converteren Europa nunha fortaleza. Infelizmente, algúns Estados están priorizando manter estas afluencias de xente fóra das súas fronteiras antes que encontrar solucións realistas. Desde o comezo de 2016, as medidas de control fronteirizo endurecéronse en moitos Estados europeos. Malia os chamamentos de diversas ONGs a ampliar as vías legais de entrada para permitir o acceso ao dereito de asilo, moitos Estados membros da Unión Europea na práctica están reducindo as vías legais dispoñíbeis.

En calquera caso, estes fluxos de persoas van continuar chegando sen importaren os atrancos que se lles poñan. Non teñen outra opción. Polo que as políticas actuais de "non-recepción" e de facer perigar o dereito de asilo son insustentábeis á hora de xestionar esta situación. De todas e todos nós depende que esta crise humanitaria non se transforme en crise de civilización, nunha crise daqueles valores fundacionais que forxaron as nosas democracias e a construción da Unión Europea. É hora de lles pórmos fin a estas políticas de freo. Unha afluencia previsíbel e manexábel de persoas que escapan para sobrevivir estase a converter nunha traxedia humana nas praias, nas fronteiras, nas plataformas ferroviarias e nas autoestradas de Europa.

En 2015 vimos mostras conmovedoras de como a sociedade civil galega e europea se mobilizaron como reacción ás noticias recibidas respecto das penurias de quen trataban de encontrar refuxio -principalmente en Alemaña-, ofrecéndose e poñendo os medios cos que contaban a dispor do que puideren precisar esas persoas, ao tempo que esixindo unha implicación clara por parte dos poderes públicos.

Neste contexto, a Deputación Provincial da Coruña aprobou unha moción na Sesión Plenaria celebrada o 11 de setembro de 2015, para solicitar ás distintas administracións públicas o seu compromiso ante a crise humanitaria que están

padecendo actualmente en Europa os/as refuxiados/as. Lamentablemente, pouco ten mellorado desde entón, tanto nas políticas dos países de acollida, como nas causas que obrigan a estas persoas a desprazarse, como nos padecementos que sofren no seu tránsito.

Nestas semanas estase impulsando tamén por parte da sociedade civil unha convocatoria de mobilización cidadá a nivel europeo de cara ao 27 de febreiro. A principal demanda diríxese á apertura de pasos seguros para os milleiros de persoas que chegan ao noso continente buscando unha nova vida, que garanta os dereitos humanos e libre de guerras e sufrimento. Para ACNUR a única maneira de evitar que esta crise empeore é tentar acabar cos contrabandistas, proporcionando unha alternativa segura, legal e gratuíta de entrada.

Por estes motivos, é proposto ao Pleno a adopción do seguinte ACORDO:

1. A Deputación Provincial da Coruña, ao igual que os outras corporacións europeas e movementos cidadás, súmase á convocatoria do 27 de febreiro e chama á súa cidadanía a participar nas iniciativas en marcha.
2. A Deputación Provincial da Coruña acorda sumarse á *Marcha Europea polos dereitos das persoas desprazadas. Pasaxe seguro XA*. para a petición de rutas seguras de chegada a Europa para permitirlle ás persoas refuxiadas alcanzar a súa seguranza sen poñeren as súas vidas en mans de traficantes e emprenderen perigosas travesías polo mar. Débense establecer vías seguras de chegada, así como máis prazas de reasentamento e de admisión humanitaria, a reunificación familiar, o patrocinio privado e os visados humanitarios e de estudos ou traballo para persoas refuxiadas, co obxectivos de posibilitar que os desprazamentos sexan xestionábeis, controlados e coordinados por parte dos estados que reciben a estes refuxiados.
3. Solicitamos do Goberno do Estado e da Unión Europea que o paso, tanto de fronteiras marítimas como terrestres, sexa autorizado ás/aos solicitantes de asilo que chegan á UE ou que xa están nela. Así pois, débense por en marcha con urxencia todas as formas de acceso legais que lle permitan as persoas refuxiadas chegar a Europa. Cómpre encontrar solucións eficientes para reubicar aos solicitantes de asilo dun Estado membro da UE a outro. Débese ofrecer acceso a uns procedementos de asilo coherentes, así como asistencia nos puntos de entrada, por toda Europa e ao longo das rutas migratorias. Á chegada de persoas refuxiadas hai que proporcionar un rexistro rápido máis unha protección temporal. En conclusión, deben crearse vías de migración legais e ofrecerse condicións de acollida dignas para todas as persoas, acordes ás convencións de dereitos humanos e de asilo e refuxio.